



Inuit Ataqatigiit Inatsisartuni

Ulloq: 13 juni 2008

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpunga:

Apeqqutit:

- 1. Naalakkersuisut Narsami Neqi A/S-ip savananik toqoraaviup matunissaanik siorasaarutit qanoq iliuseqarfiginiarpaat?**
- 2. Naalakkersuisut ilisimavaat Neqi A/S-mik matusinissamik siorasaarineq KNI A/S-ip siulersuisuini oqaluuserineqarsimanersoq?**
- 3. Naalakkersuisut KNI A/S-ip pisortaaneranut neriorsuutigisimanerpaat aningaasat 4,0 mio. kr.-t Aningaasanut Inatsimmi 2008-moortumi savaatilinnut ineriartortitsinissamut atorneqartussat Neqi A/S-mut nuunneqarsinnaanerat?**
- 4. KNI A/S aningaasaqarnermigut qanoq inissimava?**
(Inatsisartunut ilaasortaq Ane Hansen, Inuit Ataqatigiit)

Tunngavilersuut:

Tusagassiuutitigut tusaamalerparput KNI A/S-ip Narsami savanik toqoraavini matuniaraa aningaasanik kr. 4,0 milliuninik tapiiffigineqanngikkuni. Oqaatigineqarpoq aningaasat taakku kr. 4,0 milliunit savaatilinnut ineriartortitsinissamut aningaasaliissutaasut KNI A/S-ip ingerlatsinerminut nuunneqarnissaat qinnutigisimagai.

KNI A/S-ip siulersuisuini apeqqut taanna oqaluuserineqarsimanerlugu, imaluunniit pisortap nammineersutigalugu naalakkersuisunut toqqaannaq saaffiginnissutigisimallugu? Taamaattoqarsimappat KNI A/S-ip siulersuisui qanoq tamatumunnga isummernersut Naalakkersuisut paasivaat?

Piffissami matumani nioqqutissat akitsoraluttuinnarneranni pissusissamisoorsinnaanngilaq Nunatsinni nioqqutissiarisartakkatta amerlanneqisut pingaarnersaasa ilaat matuneqarnissaanut qunusaarisoqassappat.

Tamanna pillugu KNI A/S-ip siulersuisui Naalakkersuisunit tusarnavigineqarsimappat?